



Broj/Број: 04/5-50-1-18-3/10
Sarajevo/Сарајево, 30.11.2010.

IZVJEŠTAJ

s 56. godišnje konferencije Parlamentarne skupštine NATO-a,
održane u Varšavi, od 12. do 16.11.2010.

U radu 56. godišnje konferencije Parlamentarne skupštine NATO-a, održane u Varšavi, od 12. do 16.11.2010., učestvovali su: Milorad Živković, predsjedavajući Delegacije Parlamentarne skupštine BiH u Parlamentarnoj skupštini NATO-a, i Ivo Miro Jović, član Delegacije.

12.11.2010.

Održan je sastanak sekretara delegacija, sa sljedećim dnevnim redom:

1. Upoznavanje s planom rada 56. godišnje konferencije,
2. Informacija o rezultatima sastanka sekretara delegacija koji je održan u Rigi, 28.5.2010.,
3. Informacija o pripremljenim materijalima za potrebe održavanja 56. godišnje konferencije,
4. Informacija o rasporedu rada komiteta,
5. Priprema za održavanje sastanaka i konferencija PSNATO-a u 2011. godini
 - proljetno zasjedanje PSNATO-a, Varna, Bugarska, od 27. do 30.5.2011.
 - godišnja konferencija PSNATO-a, Bukurešt, Rumunija, od 12. do 16.11.2011.,
 - sastanci u 2011., 2012. i 2013. godini
6. Saradnja delegacija i Međunarodnog sekretarijata PSNATO-a.

U popodnevnim satima održan je i sastanak članova Delegacije PSBiH na kojem su upoznati s rasporedom rada 56. godišnje konferencije i zaključcima sa sastanka sekretara delegacija. Dogovoren je način praćenja rada i učešća u radu Komiteta.

Članovi Delegacije u večernjim satima posjetili su Ambasadu Bosne i Hercegovine u Poljskoj gdje je ambasadorica Koviljka Špirić sa saradnicima informirala članove Delegacije o radu Ambasade, situaciji u Poljskoj i bilateralnim odnosima između Bosne i Hercegovine i Poljske.

13.11.2010.

Rad 56. godišnje konferencije odvijao se prema utvrđenom planu. Održani su sastanci političkih grupacija konzervativaca i kršćanskih demokrata, Alijanse liberala i demokrata i grupacije socijalista prije početka rada komiteta. Na sastancima su razmijenjena mišljenja o temama koje su predviđene za raspravu tokom godišnje konferencije.

Članovi Delegacije PSBiH učestvovali su na sjednicama:

- Komiteta za ekonomiju i sigurnost,
- Komiteta za civilnu dimenziju sigurnosti,
- Komiteta za odbranu i sigurnost,
- Komiteta za nauku i tehnologiju i
- Političkog komitet.

Komitet za ekonomiju i sigurnost

Sjednicom Komiteta predsjedavao je Hugh Bayley (Ujedinjeno Kraljevstvo).

Na sjednici je raspravljano o zaključcima proljetne konferencije PSNATO-a koja je održana u Rigi, a koji se odnose na probleme ekonomije i sigurnosti.

Posebno je vođena rasprava o prijedlogu rezolucije „Izgradnja stabilnijih i prosperitetnijih međunarodnih ponuda“, čiji je cilj bio da se ponude i narudžbe za opremu za sektor odbrane i sigurnosti trebaju ukрупnjavati i objediniti s ciljem jeftinijih nabavki i bolje interoperabilnosti.

Frank Bolland, direktor za planiranje snaga u Direktoratu za politiku i planiranje, održao je prezentaciju o temi „Nabavke za sektor odbrane u svjetlu ekonomskih kriza“.

Profesor ekonomije Leszek Balcerowicz govorio je o tome kako se pripremiti i izbjeći nove ekonomske krize.

Zaključne i sumarne izvještaje o aktivnostima Potkomiteta za transatlantske ekonomske odnose dao je John Sewel (Ujedinjeno Kraljevstvo), a o aktivnostima Potkomiteta za saradnju Istok-Zapad dao je Petras Austrevicius iz Litvanije.

Attila Mesterhaazy (Mađarska) u svojstvu posebnog izvjestioca govorio je o posljedicama ekonomske krize u centralnoj i jugoistočnoj Evropi.

Komitet za civilnu dimenziju sigurnosti

U radu Komiteta učestvovao je Milorad Živković.

Sjednicom Komiteta predsjedavala je Jo Ann Emerson (SAD).

Raspravljano je o prijedlogu rezolucije „Situacija u Gruziji“.

Održane su prezentacije o temama:

- „Politička situacija u Afganistanu“, Akbar Ayazi - Radio Slobodna Evropa,
- „Izazovi vodstva u Afganistanu“, Vitalino Canas, Portugal - specijalni izvjestilac,
- „Od Lisabona do Lisabona, okvir za saradnju NATO-a i EU“.

Nakon prezentacija vođena je rasprava o iznesenim stavovima izvjestilaca i prezentatora. Izražena je velika zabrinutost zbog stanja u Afganistanu. Stanje se ne popravlja i u brojnim segmentima je sve gore i van kontrole. Nekontrolirani tokovi novca i droge su zabrinjavajući. Stalno se raspravlja o kredibilitetu Vlade Afganistana i jačanju moći talibana. Postavlja se pitanje zbog čega i na koji način talibani postaju moćniji u tokovima transfera novca u regionu.

Konstatirano je da je saradnja NATO-a i EU neophodna jer se nalazimo u 21. vijeku. Potrebno je razvijati unificirane vještine za saradnju. Dobri primjeri saradnje NATO-a i EU su Bosna i Hercegovina i Kosovo. Potrebno je osmišljavati dijalog političkih tijela NATO-a i EU koji nedostaje. Konstatirano je da EU i NATO ne saraduju najbolje u Afganistanu. O tome se priprema posebna konferencija.

Nakon prezentacija koje su bile uvod u popodnevnu raspravu vođena je rasprava o specijalnom izvještaju o stanju na zapadnom Balkanu - „Zapadni Balkan, 15 godina nakon Dejtona - postignuća i očekivanja“.

Rasprava o istoj temi vođena je tokom Rose Rothe seminara u Skoplju, koji je održan u oktobru 2010. godine.

U raspravi su izražena različita viđenja u vezi s nekim pitanjima na području zapadnog Balkana, posebno u vezi s ulogom međunarodne zajednice u BiH i na Kosovu. Smatra se da nema jedinstvenog stava o nekim pitanjima i da je to realnost.

Konstatiran je napredak u brojnim oblastima. Odgovornost za stanje na Balkanu ne smije se dijeliti. Ne smije biti pošteđenih i manje odgovornih za postojeće probleme koji se u nekim pitanjima gomilaju duži period. Regionalna saradnja je dobra i brojni su pokazatelji koji to potvrđuju. Praktično, mogućnost vojnog konflikta je isključena zbog brojnih pozitivnih tokova i procesa koje treba uvažiti, kao i ozbiljnog pristupa pojedinih lidera zemalja zapadnog Balkana.

Predstoji ozbiljniji pristup rješavanju problema manjinskih naroda. Pokušaj majorizacije u pojedinim zemljama mora se rješavati daleko transparentnijim pristupom i iskazanom voljom onih koji sebe smatraju većinom ili, kako neki lideri vole reći, „temeljnim“ narodom, što je njihova pogrešna percepcija.

Izražena je zabrinutost za rješavanje problema vojne imovine u Bosni i Hercegovini. Očekuje se od nove vlade da riješi to pitanje i otvori mogućnost uspješnije saradnje s NATO-om.

Vladavina zakona je daljnji preduslov za rješavanje otvorenih i brojnih problema na Kosovu, posebno onih u vezi s pitanjem oporavka ekonomije. Očekuje se početak dijaloga između Beograda i Prištine.

Saradnja NATO-a i EULEX-a na Kosovu je dobra. Među građanima Kosova još uvijek su podijeljena mišljenja o ulozi EULEX-a. Naime, nema dovoljno informacija o pojedinim segmentima misije.

Predstavnici NS Republike Srbije govorili su o napretku koji je učinjen u Srbiji u posljednjih pet-šest godina. Posebno su naglasili značaj Deklaracije o neutralnosti Srbije iz 2007. godine, što pojedini analitičari ne smatraju i ne razmatraju tako ozbiljno kada se razgovara o aktivnostima Srbije i NATO-a.

Istaknuli su i značaj donošenja Rezolucije o Srebrenici u NS Republike Srbije kao i tokove aktivnosti prema EU koji su osmišljeni i prepoznati kao uspješni.

Predstavnici Turske ponovo su otvorili pitanje imena Makedonije i posljedica koje zbog toga ima Makedonija na putu ka NATO-u.

Milorad Živković učestvovao je u raspravi o ovoj temi i osvrnuo se na neka aktuelna pitanja koja su u vezi sa stanjem u BiH, a prezentirana su u izvještaju o stanju na zapadnom Balkanu.

Komitet za odbranu i sigurnost

U radu Komiteta učestvovao je Ivo Miro Jović.

Sjednicom Komiteta predsjedavao je Julio Miranda Calha, predsjedavajući (Portugal).

Raspravljano je o prijedlogu rezolucije „Afganistan - put kroz tranziciju“, izvjestilac Sven Mikser.

Prezentacije Bogdana Klichia o temi „Kolektivna odbrana, krizni menadžment i promocija međunarodne stabilnosti - zadaci NATO-a i Lisabonski samit“ i generala Mieczysława Cieniucha o temi „Poljsko vojno angažiranje u NATO-u - širi aspekti“ bile su uvod u raspravu u kojoj su poseban pečat dali Frank Bolland (Direktorat NATO-a) i Sven Mikser iz Estonije.

Politički komitet

U radu Komiteta učestvovao je Milorad Živković.

Sjednicom Komiteta predsjedavao je Karl A. Lamers, predsjedavajući (SR Njemačka).

Tokom zasjedanja Komiteta vođena je rasprava o prijedlogu rezolucije „Značaj jačanja NATO partnerstva“, kao i o koheziji Alijanse, izvjestilac Raynell Andreychuk.

Jacek Najdar govorio je o poljskim vanjskopolitičkim i sigurnosnim prioritetima.

Andrzej Szeptycki iznio je svoje mišljenje o temi „Ukrajina pod predsjedavanjem Viktora Janukoviča: Unutrašnje promjene i vanjske posljedice“.

O izvještaju o aktivnostima zemalja NATO-a koje su kontakt zemlje u PFP zemljama, kao i o predsjedničkim izborima u Bjelorusiji komentar su dali Jose Luis Arnaut iz Portugala i Dzianis Melyantsou - Balkanski institut.

Komitet za nauku i tehnologiju

U radu Komiteta učestvovao je Ivo Miro Jović.
Sjednicom Komiteta predsjedavao je Jan Arild Ellingsen (Norveška).

Tokom zasjedanja Komiteta vođena je rasprava o prijedlogu rezolucije „Partnerstvo s Rusijom u sektoru sigurnosti i raketna odbrana“, David Scott (SAD).

Prezentiran je prijedlog izvještaja o temi “Nedozvoljena trgovina oružjem i raketna odbrana i kako ostvariti bolje partnerstvo s Rusijom“, David Scott (SAD).

Prezentiran je i prijedlog izvještaja o temi „Održiva energetska strategija za Alijansu“, Philippe Vitel (Francuska).

Održane su prezentacije o temama: „Klimatske promjene - postkopenhagenski izazovi“ - Pierre Claude Nolin (Kanada) i „NATO politika i aktivnosti u oblasti kontrole naoružavanja, razoružavanja i nedozvoljene trgovine“ - ambasador Jacek Bylica.

14.11.2010.

Članovi Delegacije PSBiH učestvovali su na sljedećim sjednicama:

- Komiteta za civilnu dimenziju sigurnosti,
- Komiteta za odbranu i sigurnost,
- Komiteta za ekonomska i sigurnosna pitanja,
- Političkog komiteta.

Komitet za civilnu dimenziju sigurnosti

U radu Komiteta učestvovao je Milorad Živković. Sjednicom Komiteta predsjedavala je Jo Ann Emerson (SAD).

Tokom zajedničkog rada Komiteta održane su prezentacije o temama:

- „Da li je nepouzdana sigurnost odgovor za stanje u Somaliji?“, Ej Hogendoorn Nairobi,
- „Sigurnost na moru: NATO i EU - uloga i koordinacija“, Lord Jopling (Ujedinjeno Kraljevstvo).

Vođena je rasprava o izlaganjima s brojnim pitanjima o efikasnosti snaga NATO-a u borbi protiv pirata. Iako su ostvareni značajni rezultati i vidljivi pomaci u strategiji borbe protiv pirata, postavljaju se pitanja o nekim propustima o kojima se pisalo i raspravljalo u javnosti posljednjih sedmica.

Potrebna je veća saradnja EU i NATO-a i angažiranije uključivanje Kine, Indije i Rusije u borbu protiv pirata. Postavlja se pitanje kako opstaju pirati jer i dalje predstavljaju opasnost za plovila zemalja NATO-a i EU. Pozvana su i zvanična tijela UN-a da aktivnije učestvuju u aktivnostima i akcijama borbe protiv pirata.

Predstavnici Gruzije izrazili su zahvalnost za interes NATO-a da pomogne Gruziji. Konstatirali su napredak u brojnim segmentima, ali i pozvali NATO i EU da učestvuju u započetim procesima oporavka Gruzije. Izrazili su zabrinutost situacijom u Abhaziji i prisustvom vojnika Ruske Federacije u tom dijelu jer smatraju da se trebaju povući i uključiti u procese koji doprinose oporavku ekonomije.

Predstavnici PSNATO-a prezentirali su svoje mišljenje o stanju u Gruziji nakon dvije radne posjete Gruziji. Snažno su podržali Rezoluciju o Gruziji i pozvali zemlje EU i NATO-a da pomognu Gruziji. Rezoluciju su ocijenili potpuno izbalansiranom i logičnom nakon svega što se dogodilo proteklih godina. Predstavnici Ruske Federacije izrazili su svoju zabrinutost i neslaganje s Prijedlogom rezolucije o Gruziji.

Raspravom, usvajanjem amandmana i podrškom prijedlogu rezolucije „Situacija u Gruziji“ i novom konceptu u razvoju NATO-a sa izvjestiocima Lordom Joplinom i Ullom Schmidtom završen je drugi dan rada Komiteta.

Komitet za odbranu i sigurnost

Uvodno izlaganje imao je Julio Miranda Calha (Portugal).

U radu Komiteta učestvovao je Ivo Miro Jović.

Raspravljano je o izvještaju Potkomiteta o temi „Nestratiško oružje SAD-a u Evropi - osnovna rasprava NATO-a“ koji su prezentirali Raymond Knops iz Holandije i Simon Lunn - DCAF.

O situaciji na krajnjem sjeveru planete prezentaciju je imao Ragnheideur E. Arnadottir Island koji se pitao da li NATO ima bilo kakvu ulogu u tom dijelu svijeta.

Tokom sesije o amandmanima na rezoluciju „Afganistan - put kroz tranziciju“ predsjedavao je Sven Mikser iz Estonije.

Politički komitet

U radu Komiteta učestvovao je Milorad Živković.

Sjednicom je predsjedavao Karl A. Lamers, predsjedavajući, SR Njemačka.

Održana je prezentacija o temi „Sigurnost u Golfskom zaljevu i na Arapskom poluotoku: planovi NATO-a“.

Mike Ross se u svom izlaganju posebno osvrnuo na stanje u navedenom regionu i iznio svoje mišljenje o mogućim propustima NATO-a.

Vođena je rasprava o prijedlogu rezolucije „Značaj jačanja NATO partnerstva“, o izborima u Komitetu i Potkomitetu i aktivnostima u 2011. godini.

15.11.2010.

Održana je sjednica Stalnog komiteta na kojoj je sumirana rasprava o prijedlogu rezolucija i deklaracija Konferencije.

16.11.2010.

Održana je plenarna sjednica PSNATO-a.

Plenarnoj sjednici prisustvovali su Milorad Živković i Ivo Miro Jović, članovi Delegacije PSBiH u PSNATO-a u kojoj su bili

Tokom plenarnog zasjedanja izlagali su:

- John Tanner, predsjedavajući PSNATO-a,
- Anders Fogh Rasmussen, generalni sekretar NATO-a i predsjedavajući Sjevernoatlantskog vijeća, koji se linkom obratio učesnicima 56. konferencije,
- Grzegorz Schetyna, predsjednik Sejma Republike Poljske
- Donald Tusk, premijer Republike Poljske
- ambasador Janez Lenarcic, direktor OSCE-ovog Instituta za ljudska prava i demokratizaciju institucija,
- ambasador Marcie Reis, zamjenik pomoćnika državnog sekretara SAD-a za multilateralne odnose,
- general Stanislaw Koziej, šef Biroa za nacionalnu sigurnost Republike Poljske.

Nakon navedenih izlaganja izabran je novi predsjedavajući PSNATO-a dr. Karl A. Lamers (SR Njemačka) koji se nakon izbora obratio učesnicima 56. konferencije.

Predsjedavajući PSNATO-a prezentirao je prijedlog aktivnosti PSNATO-a u 2011. godini.

Tokom završne rasprave glasano je o prijedlogu rezolucija o stanju u Afganistanu, stanju u Gruziji, potrebi jačanja partnerstva u Alijansi i Alijansi s Rusijom.

Usvojen je budžet PSNATO-a za 2011. godinu.

Prijedlozi rezolucija su usvojeni i time je zaključen rad 56. godišnje konferencije PSNATO-a.

Izvještaj sačinio:

Željko Grubešić

PREDSJEDAVAJUĆI DELEGACIJE
dr. Milorad Živković

Dostaviti:

- Kolegiju Doma naroda
- Kolegiju Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Komisiji za vanjske poslove Predstavničkog doma
- Kolegiju Sekretarijata
- Kopija: Ministarstvu vanjskih poslova BiH